

TEZAU LITURGIC

19 IUNIE

**ACATISTUL
SF. IERARH
IOAN
MAXIMOVICI,
ARHIEPISCOPUL
SAN FRANCISCO
III**



MOSCOVA, 2000

АКАФИСТ ИЖЕ ВО СВЯТЫХ ОТЦУ НАШЕМУ СВЯТИТЕЛЮ ИОАННУ ШАНХАЙСКОМУ, АРХИЕПИСКОПУ САН-ФРАНЦИССКОМУ

Кондак 1

Избраннаго во архиереях Божиих и сосуда Духа Святаго, величаем тя, блаженне отче Иоанне, ты же, яко имуще велие дерзновение пред Владыкой всех, от всяких бед нас свободи, да зовем ти:

Радуйся, Иоанне архиепископе, великий чудотворче.

Икос 1

Ангели Божии удивляшеся, како ты, блаженне, подвиги свои великия на земли проходил еси, постник быв, бденник и милостивец. Мы же, зрящи на таковое твое житие, вопием ти:

Радуйся, в иночестве имя святаго сродника твоего приявый;

Радуйся, в подвигах святым подражавый;

Радуйся, яко ревностию к Православию еще в юности объят был еси;

Радуйся, яко таковую ревность во всей жизни твоей показал еси;

Радуйся, на служение Церкви в юности

вступивый;
Радуйся, верность Ей до конца жизни
сохранивый;
Радуйся, Иоанне архиепископе, великий
чудотворче.

Кондак 2

Видев жизнь твою Богоугодную, святитель
Христов Антоний в чин иноческий и в сан
священный возвел тя, богоносне отче Иоанне, ты
же, Господу служба благочестно, нас научал пети:
Аллилуиа.

Икос 2

Разумев тя, Богоносне отче, сосуд Духа Святаго,
в сан архиерейства Антоний блаженный возведе
тя, ведая, яко ты подражатель Отцам древним
явишься еси. Мы же, дивящиеся сему, зовем ти:
Радуйся, пастырей Церкви достойне
воспитавый;
Радуйся, образ подвижничества им явивый;
Радуйся, по смирению сана епископскаго не
хотевый;
Радуйся, смирение истинное в сердце имевый;
Радуйся, в сан архиерейства возведенный;
Радуйся, за послушание его приемый;
Радуйся, Иоанне архиепископе, великий
чудотворче.

Кондак 3

Силою свыше укрепляемь, богоносе, истинный Ангел Церкви своя был еси, и не токмо православная паства твоя, но иновернии, зная тя, яко велика святителя и чудотворца, возопиша Богу: Аллилуиа.

Икос 3

Веру твердую имуще в сердце твоём, святе Иоанне, дерзновение велие стяжал еси у Владыки всех, Пастыреначальника Христа, по слову бо твоему и молитве души нечистии людей оставляете. Ведая же сие, вопием ти:

Радуйся, на кафедру Шанхайскую в день Введения во храм Пресвятыя Богородицы возшедый;

Радуйся, попечение о пастве своей смятенней приемый;

Радуйся, град Шанхай от разрушения сохранивый;

Радуйся, вселенским иерархом от инославнаго исповеданный;

Радуйся, духа зла от отрока отгнавый;

Радуйся, тем ему здравие духа и тела подавый;

Радуйся, Иоанне архиепископе, великий чудотворче.

Кондак 4

Уведев бурю и гонение, на православных в Китае готовящимся воздвиженным быти, яко Моисей второй, извел еси чад своих в страны христианския, да спасено будет стадо Христово. Спасеннии же тобою Богу возопиша: Аллилуиа.

Икос 4

Страха Божия исполнен быв, святе отче, и того ради слыша молитвы твоя Господь, иже праведныя любяй и грешныя милуяй. Ты же, болезнуя духом о пастве своей, нощию со крестом коленопреклоненно о ней молился еси. Зная же о сем, похвальныя пения воспеваем ти: Радуйся, молитвенниче, молитвою своею ветрам запрещавай;
Радуйся, иерарше Бога Вышняго, душу свою за паству полагавай;
Радуйся, оберегавый люди своя обхождением нощным;
Радуйся, святой человекче, Крестом Господним и молитвою соделавай диавола немощным;
Радуйся, остров, иде же бысть шесть тысяч овец стада Доброго Пастыря, два лета от бурь хранивай;
Радуйся, тем люди своя сохранивай;
Радуйся, Иоанне архиепископе, великий чудотворче.

Кондак 5

Боготечною звездой явился еси, святе, всем чтущим тя: точиши бо чудесы, исцеляя души и тела прибегающих к заступничеству твоему, и о сем радуясь, Богу вопием: Аллилуиа.

Икос 5

Видев, владыко святой, яко мнози святии Божии, на Западе просиявшия, без достодолжнаго почитания пребывают, быв архиереем Запада, таковым славу воздавал еси, и мы, видяще таковую твою о угодниках Божиих ревность, зовем ти:

Радуйся, Апостолом Запада нареченный;

Радуйся, чудотворцем великим явленный;

Радуйся, со всеми прославленными тобою Бога молящий о всех нас;

Радуйся, на высоты молитвы восходивше, над землей молящимся видимый быв;

Радуйся, о убиенном крале Сербстем панихиду служивший;

Радуйся, православным Франции и Голландии епископов давший;

Радуйся, Иоанне архиепископе, великий чудотворче.

Кондак 6

Апостолом Запада нареченный, ты не токмо словом, но и самою жизнью своею Православие

Святое проповедал еси, и сие видевше, иерей Церкви Римския яко святаго исповеда тя, да вси, во Христа верующии, Богу вопиют: Аллилуиа.

Икос 6

Видеша архиереи православнии, яко ты еси, блаженне, велий светильник, пред Богом горящий, не под спуд, но на свещник — кафедру во град святаго Франциска постави тя. Мы же, зряще пастырское служение твое, зовем ти: Радуйся, архиерею, воистину по любви Божией сие служение принявший и чести мирския отнюдь не искавший; Радуйся, награду нетленную за то на небесех стяжавший; Радуйся, ревнителю о храмах Божиих; Радуйся, за то во храме почивати мощами своими удостоившийся; Радуйся, праведниче Божий, аки свеща великая пастве светивший; Радуйся, светильниче, елеем благодати Божией наполненный и от огня любви Божией возженный; Радуйся, Иоанне архиепископе, великий чудотворче.

Кондак 7

Хотя вселити в сердца пасомых тобой
благочестие нелицемерное, ты, блаженне отче,
яко Тихон Задонский, обличил еси паству твою,
иже бесовское игрище устроиша и
пренебрегоша храмом Божиим и в ничто
вмениша память праведника Кронштадтскаго.
Ведяще же тя, яко ревнителя Православия и
посекателя ересей, Богу зовем: Аллилуиа.

Икос 7

Незлобие свое и кротость христианскую показал
еси, блаженне отче, егда в суд мирский принуди
неции людие явиться тя, понося тя и вменяя ти
в вину яже не сотворих ты. Ты же не осудил
никого из гнавших тя, чадам же духовным
глаголар еси: первопричина суда и гонений —
диавол. Ублажая же смирение твое, зовем ти:
Радуйся, яко фарисеем новым живой укор был
еси;
Радуйся, яко подвиги твоими истинное
благочестие стяжал еси;
Радуйся, поношения и гонения от наущаемых
диаволом приявый;
Радуйся, смиренно сие гонение претерпевый;
Радуйся, яко иерарси Савва, Леонтий и
Нектарий, иереи Спиридон, Митрофан, Николай
и Леонид, Ариадна игумения и Евгений чтец до
конца с тобою пребыли есте;

Радуйся, сотрудниками и сподвижниками твоими в беде и обстоянии не оставленный;
Радуйся, Иоанне архиепископе, великий чудотворче.

Кондак 8

Странник и пришелец был еси на земли в жизни сей временной, богоносне отче, по глаголу Апостола, и тленных сокровищ не взыскуя, обрел еси богатство нетленное, и сего ради дерзновение стяжал еси у Христа Царя, Его же престолу ныне предстоя, с Херувимы поеши:
Аллилуиа.

Икос 8

Всем вся был еси, по речению Павлову, отче наш Иоанне святителю: болящим — целитель, немощным — помощник, заблудшим — наставитель и вразумитель, унылым — утешитель. И ныне, радуясь о чудесех, яже творятся по всей земле молитвами твоими, взываем ти:

Радуйся, избранниче Божий, путем узким во всю жизнь свою шедший;

Радуйся, путем тем в Горний Иерусалим возшедший;

Радуйся, яко чудотворения дар Бог дарова ти;

Радуйся, яко дар сей во спасение душ и телес прибежавших к тебе употребил еси;

Радуйся, еретичествующих и суемудрствующих
обличителю;
Радуйся, уклоняющихся с пути истины
вразумителю;
Радуйся, Иоанне архиепископе, великий
чудотворче.

Кондак 9

Всякое естество Ангельское удивишася, зря тя,
отче святой: ты бо, еще на земли живый, духом
в мире горнем пребывал еси, имея очи твои
горе, и зрел еси неплотскима очима Сущаго во
вся веки, Емуже выну взывал еси: Аллилуиа.

Икос 9

Ветии многовещанная како возмогут достойно
описать прешествие твое, святче Божий, из
жизни временная в вечную, идеже воистину
живый есть, якоже и глагола дщери духовней
твоей в видении соннем: рцы людем: аще и
умер, живый аз есть. И о сем радуящеся,
вопием ти:

Радуйся, кончину свою предуведевый;
Радуйся, достойне к ней приготовивыйся;
Радуйся, на молитве, якоже и Ангел твой,
святитель Тобольский, в вечность прешедый;
Радуйся, Заступницу Усердную во иконе Ея
Курстей Свидетельницей кончины своея
имевый;

Радуйся, христианския кончины живота своего,
безболезненны, непостыдны, мирны
сподобивыйся;
Радуйся, праведности ради твоея нетления от
Бога удостоивыйся;
Радуйся, Иоанне архиепископе, великий
чудотворче.

Кондак 10

Спасти желая христианина некоего инославнаго
и к Православию привести его, явился еси ему
нощию и повеле крестное знамение творити, яко
же учит Церковь Православная. Сей же восстав
от сна, крест творя, вопрошаем быв от
язычника о крестном знаменнии его, отвечаая
тому, молюся, рек. Ликовствуя же о сем, с тобой
купно, предстательствующем о нас ко Архиерею
Великому, поем Ему: Аллилуиа.

Икос 10

Якоже при жизни, тако и по смерти твоей,
святителю Божий, стена еси ты верным и
защитение надежное, велие бо дерзновение ко
Христу имущему, дадеся тебе власть над
стихиями воздушными мира сего. Зряща же тя,
таковаго о нас ходатая, зовем ти:
Радуйся, на Филипинстех островех молитвою
некогда ветрам запретивый;
Радуйся, тем паству Христову от уничтожения

сохранивший;

Радуйся, иерарше праведне, ветер остановивый и тем семью некую от огненного запаления сохранивший;

Радуйся, яко умоляемый о заступлении во всяких обстояниях, предстателем надежным и скоропослушником явился еси;

Радуйся, моления людския в засухе велицей услышавый;

Радуйся, яко Илия древле, дождь молитвою своею на землю изведый;

Радуйся, Иоанне архиепископе, великий чудотворче.

Кондак 11

Пение благодарственное приносим ныне Богу о прославлении твоём, угодниче Божий Иоанне! Ты бо, еще на земли живый, яко святой Божий почитаем был еси, по преставлении же твоём чудотворения, по всей земле творящиеся, святость твою непреложно утверди. И ныне, вместе с тобою, в день памяти успения твоего к лику святых причтенным, взываем радостно Богу: Аллилуиа.

Икос 11

Светильник велий, огнем Святаго Духа горящий, показался еси нам, отче святой Иоанне, ты бо не токмо светом благовестия Христова миру

сиял еси, но и, светом нетварным осияваемый, благодать Светодавца миру источил еси. Ныне же, яко Фаворского света приснозрителю, вопием ти:

Радуйся, еще при жизни зрения света нетварнаго сподобивыйся;

Радуйся, огнем, якоже древле Сергей святыи, в соборе Шанхайстем причастивыйся;

Радуйся, в свете нетварнем по успении твоём диакону своему явившийся;

Радуйся, Христу причащавшийся и Тому Преобразившемуся уподобивыйся;

Радуйся, Иверстей иконе моление в свете нетварнем совершивший;

Радуйся, над Шанхайским собором вознесенный, "Христос воскрес!"

возгласивший;

Радуйся, Иоанне архиепископе, великий чудотворче.

Кондак 12

Благодати источник явился еси нам, святителю Божий Иоанне, молишися бо за ны усердно, и по вере прибегающих к заступлению твоему подаются дары Божии обильно. И кто исчислит вся чудеса твоя? Кто измерит величие святости твоея? Но внимая ныне повествованием о чудесех твоих, ихже благоволи открыти Бог, радостне поем Ему: Аллилуиа.

Икос 12

Пение хвалебное приносим ти, чудотворче и угодниче Божий Иоанне, ликовствуя о токах чудес, ихже точиши всем, с верою взыскующим предстательства и ходатайства твоего ко Творцу всяческих, Емуже ты выну зывал еси: отцев наших Господь и Бог, благословен еси. Ныне же, предстояще образу твоему честному [или честным мощем твоим], яко велицему избраннику Божию, вопием ти:

Радуйся, еще в отрочестве инославную в Православие обративый;

Радуйся, после в трудах миссионерских во все время служения твоего Церкви пребывавый;

Радуйся, в юности чудо святого Мелетия Харьковскаго записавый;

Радуйся, сам токи чудес обильны и при жизни, и по смерти источивый;

Радуйся, святым всем честь великую при жизни своей воздававший;

Радуйся, сам к лику оных по успении своем причтенный;

Радуйся, Иоанне архиепископе, великий чудотворче.

Кондак 13

О великий чудотворче и предивный угодниче Христов, святителю отче Иоанне! Приими сие малое тебе хваление наше и моли прославившего

тя чудесами и нетлением Господа сил, да помилует неключимых рабов Своих и да дарует нам милость, мир, здравие, спасение, прощение и благое поспешение, да вси мы, славя Бога, дивнаго во святых Своих, воспоем Ему:

Аллилуиа.

[Сей Кондак глаголи трижды, и паки Икос 1:
Ангели Божии удивляшеса: и Кондак 1:
Избраннаго во архиереех Божиих:]

